

आकाशवाणी

खबरां श्रुति खजुरिया कोला

1. प्रधानमंत्री नरेंद्र मोदी होरें आखेआ जे 2025 ब'रा राश्ट्री सुरक्षा खेड्डें ते नमिएं सयाइंसी काड्डें आहले खेतरें च भारत लेई गौह करने आहले मील दे पत्थर तय करने आहला रेआ।
2. आकाशवाणी परां अपने 'मन की बात' प्रोग्राम च प्रधानमंत्री मोदी होरें आपरेशन सिंदूर गी उजागर कीता।
3. प्रधानमंत्री होरें दस्सेआ जे विकसित भारत संवाद दा दुआ चरण तौलें गै आयोजित कीता जाहग। आपूं बी ओह युवा नेता संवाद च हिस्सा लैडन।
4. राष्ट्रपति द्रौपदी मुर्मू होर अज्ज कर्नाटक दे करवार नौसेना अड्डे पर बाघ, शीर पनडुब्बी दा दौरा करा'रदियां न। एह कलवरी श्रेणी दी पनडुब्बी ऐ।
5. अज्ज बड्डलै उत्तरी भारत दे मते सारे हिस्सें च घने कोहरे करी हवाई ते रेल सेवाएं च विघ्न पेआ-केइएँ राज्यें च कोहरे दी घनी चादरै करी किश नजरीं नेई आवा करदा हा जेहदे नै सामान्य आमद ओ रफ्त प्रभावित होई।
6. यूक्रेन दे राष्ट्रपति वोलोदीमीर जेलेसकी हुंदा फ्लोरिडा च अमरीकी राष्ट्रपति डोनाल्ड ट्रम्प हुंदे कन्नै बैठक लाने दा प्रोग्राम ऐ।

<><><><><><>

PM-Mann Ki Baat

प्रधानमंत्री नरेंद्र मोदी होरें आखेआ ऐ जे भारत नै इस ब'रे राश्ट्री सुरक्षा थमां लेइयै खेड्डें दे खेतर ते विज्ञान लैबोरेटरिएं थमां लेइयै दुनिया दे सभनें शा बड्डे मंचें तगर हर थाहै पर अपनी मजबूत छाप छोड़ी ऐ। अज्ज आकाशवाणी पर अपने “मन की बात” कार्यक्रम दे राहें देशवासिएं कन्नै अपने बचार सांझे करदे होई श्री मोदी होरें ब'रे 2025 गी चेता करदे होई आखेआ जे इस ब'रे नै हर भारतवासी गी गर्व करने दे केई मौके दिते न। उ'नें आखेआ जे आपरेशन सिंदूर इस ब'रे हर भारतवासी लेई गर्व दा प्रतीक बनी गेआ। उ'नें आखेआ जे दुनिया नै साफ दिक्खेआ जे अज्जै दा भारत अपनी सुरक्षा कन्नै कोई समझौता नेई करदा। प्रधानमंत्री होरें वंदे मातरम दी 150मीं ब'रे गण्ड पर लोकें दे उत्साह ते जोश दी सराहना कीती। उ'नें लोकें सवां हैशटैग वंदे मातरम दे कन्नै अपने स्नेह ते विचार, सुझास भेजने दा अनुभव कीता हा। प्रधानमंत्री होरें आखेआ जे 2025 आहला ब'रा खेड्डें आस्तै बी यादगार रेआ ऐ। भारत दी मर्दे दी क्रिकेट टीम

नै आई.सी.सी चैंपियन्स ट्रॉफी जिती। महिला क्रिकेट टीम नै पैहली बारी विश्व कप जितेआ ते दृष्टि बाधितें महिलाएं दी टी-20 क्रिकेट टीम नै विश्व कप जितिये इतिहास रचेआ। मोदी होरें आखेआ जे एशिया कप टी-20 क्रिकेट च बी भारत दा तिरंगा लहराया ऐ। उनें विश्व चैंपियनशिप च कई सारे तगमे हासल करने आहले पैरा एथलीटें दी बी सराहना कीती। प्रधानमंत्री होरें आखेआ जे इस बरे विज्ञान ते अंतरिक्ष खेतर च बी भारत नै बड़ी शाल मारी ऐ। गुप कैप्टन शुभांशु शुक्ला अंतरराष्ट्री अंतरिक्ष स्टेशन पुज्जने आहले पैहले भारतीय बने। प्रधानमंत्री होरें दस्सेआ जे पर्यावरण संरक्षण ते जंगली जीएं-जैतुएं दे संरक्षण कन्ने जुड़े दे बी कई जत्न इस बरे कीते गए। प्रधानमंत्री होरें भारत च चीतें दी गिनतरी 30 थमां बढ़ होई जाने पर खुशी जाहिर कीती। प्रधानमंत्री होरें आखेआ जे इस बरे आस्था, संस्कृति ते भारत दी अनुठी विरासत दा संगम दिक्खने गी लब्बा। बरे दे शुरू च प्रयागराज महाकुम्भ नै सारेंगी हैरान करी दिता ते बरे दे खीरें च अयोध्या च राम मंदर ध्वाजारोहन समारोह नै हर भारतवासी गी मानें नै भरी दिता। श्री मोदी होरें आखेआ जे स्वदेशी चीजें प्रति लोकें दा उत्साह हुन लब्बन लगी पेआ ऐ। उनें आखेआ जे लोक हुन उनें चीजें गी खरीदारदे न जिनेंगी भारत दे लोकें अपनी मेहनत कन्ने बनाए दा ऐ ते ओहदे थमां भारत दी मिट्टी दी खुशबू औंदी ऐ। प्रधानमंत्री होरें आखेआ जे अज्ज दुनिया भारत आहली भेठा बड़ी आसैं मेदें कन्ने दिक्खारदी ऐ ते एहदी सभनें थमां बड़ी वजह युवा शक्ति ऐ। प्रधानमंत्री होरें दस्सेआ जे विकसित भारत संवाद दा दुआ चरण तौलें गै आयोजित कीता जाहग। उनें गलाया जे अगले बरे 12 जनवरी गी स्वामी विवेकानंद हुंदी जयंती पर राष्ट्री युवा दिवस मनाया जाहग। उस दिन ओह आपूं बी युवा नेता संवाद च हिस्सा लैडन। प्रधानमंत्री होरें आखेआ जे स्मार्ट इंडिया हैकाथॉन इक्क होर मौका ऐ जित्थे विचारें गी अमल च आहनेआ जंदा ऐ। उनें गलाया जे इस बरे दे हैकाथॉन दा समापन हाल च गै होआ ऐ। एहदे च विद्यार्थियें 80 थमां बढ़ सरकारी मैहकमे दी 270 थमां मती समस्याएं पर कम्म कीता। प्रधानमंत्री होरें जानकारी दिती जे पी.एम सूर्य घर मुफ्त बिजली योजना दे राहें सरकार हर इक लाभार्थी परिवार गी सौर पैनल लाने आस्तै 75 जहार थमां 80 जहार रपे तगर दी राशि देआरदी ऐ। अज्जै दे अपने “मन की बात” कार्यक्रमें च प्रधानमंत्री होरें जम्मू-कश्मीर दे बारामुला दे बारें च बी गल्ल कीती जित्थे इक पुरातत्व विज्ञानी नै किश उच्चे टिब्बे दिक्खे जिंदे वैज्ञानिक शोध दे मगरा एह पता लग्गा जे एह टिब्बे इंसानें दे बनाए दे इक बड़े ढांचे दे बचे दे हिस्से हे। प्रधानमंत्री होरें अगगे आखेआ जे कश्मीर थमां जहारां किलोमीटर दूर फ्रांस दे इक अजैबघरें च इक परानी ते धुंधली तस्वीर मिली ही ते बारामुला दी ओकड़ी तस्वीर च त्रै बौध स्तूप नजरी आवा'रदे हे। प्रधानमंत्री होरें खुशी जाह कीती जे कश्मीर दा शानदार इतिहास इस चाल्ली सामने आया ते एह इतिहास तकरीबन 2 जहार बरे पराना ऐ। उनें आखेआ जे कश्मीर दे जहानपोरा च एह बौध परिसर लोकें गी कश्मीर दे इतिहास ते ओदी समृद्ध पंछान दा चेता दोआंदा ऐ। उनें मेद बुज्झी जे 2026

विकसित भारत गी पूरा करने दी जातरा च इक महत्वपूर्ण पड़ांs साबत होग। प्रधानमंत्री होरें अपने संबोधन च खीरे च फिट इंडिया मूवमेंट दी बी गल्ल कीती। उनें स्याले आहली इस रूतें दरान सभनें कसरत करने ते फिट रौहने लेई गलाया। प्रधानमंत्री होरें 'मन की बात' कार्यक्रम दे माध्यम कन्नै सभनें देशवासिएं गी 2026 दिआं शुभकामनां दितिआं।

<><><><><><>

Prez. Karnatka Visit

राश्ट्रपति द्रौपदी मुर्मू होर अज्ज कर्नाटक दे करवार नौसेना अड्डे पर बाघ, शीर पनडुब्बी दा दौरा करा'रदियां न। एह कलवरी श्रेणी दी पनडुब्बी ऐ। यात्रा दरान नौसेना प्रमुख एडमिरल दिनेश के त्रिपाठी होर बी राश्ट्रपति हुं'दे कन्नै मौजूद हे। एहदे थमां पैहले करवार च औने पर राज्यपाल थावर चंद गहलोत होरें राश्ट्रपति हं'दा सोआगत कीता। राश्ट्रपति मुर्मू होर कल्लै सवां गोवा, कर्नाटक ते झारखंड दी 4 दिन दी जातरा पर न। उनें कल झारखंड सवां यात्रा दी शुरूआत कीती ही।

<><><><><><>

PM CS

प्रधानमंत्री नरेन्द्र मोदी होर अज्ज 5में राष्ट्रीय मुख्य सचिव सम्मेलन दी नमी दिल्ली च अध्यक्षता करा'रदे न। 3 दिन दा एह सम्मेलन 26 दिसंबर गी शुरू होआ हा। इसदा मकसद राष्ट्रीय विकास प्राथमिकताएं पर लगातार संवाद राएं केंद्र ते राज्यें भागीदारी गी मजबूत करना ऐ। एह सम्मेलन सहयोगपूर्ण संघवाद आहले प्रधानमंत्री हुन्दे नजरिए मूजब ऐ ते इक्क ऐसा मंच ऐ जित्थे केंद्र ते राज्य समावेशी ते भविष्य दे मुजब आर्थिक बाददे आस्तै मनुकखी संसाधनें दी क्षमता दे सभनें थमां बेहतर तरीके कन्नै इस्तेमाल दी रूप-रेखा तय करदा ऐ। सम्मेलन दा विशे ऐ विकसित भारत आस्तै मानव संसाधन। एहदे च राज्यें ते केंद्र शासित प्रदेशों दी बेहतरीन कम्म करने दे तौर-तरीकें गी सांझा कीता जा'रदा ऐ। सम्मेलन च चर्चा दे 5 महत्वपूर्ण खेतर न-बच्चें दी शिक्षा, स्कूली शिक्षा, कौशल विकास, उच्च शिक्षा, खेड्ड ते पढ़ाई दे अलावा होर दुइयां गतिविधियां। सम्मेलन च 6 विशेष सत्र रक्खे गेदे हे।

<><><><><><>

HM-IMA

गृह मंत्री अमित शाह होरें आखेआ जे भारती चिकित्सा संघ आई.एम.ए. नै सेहत सरबन्धी खेतर च बड़ा मता योगदान दित्ता ऐ। अहमदाबाद च अज्ज भारती चिकित्सा संघ दे कार्यक्रम च उनें आखेआ जे आयुश्मान भारत योजना कन्नै देसै च बड़ा बड़डा बदलाव आया ऐ। उनें इब्बी आखेआ जे कोरोना काल च डॉक्टरें मरीजें गी पैहली तरजीह दिती। गृह मंत्री अमित शाह होरें

अहमदाबाद नगर निगम दी ड्रेनेज च पाइपलाइन ते एस.जी जरनैली शिड़क पायलेट प्रोजेक्ट दे पैहले गेड़ दा उद्घाटन कीता।

<><><><><><>

Chauhan G Ram G

ग्रामीण विकास मंत्री शिवराज सिंह चौहान होरें कांग्रेस पार्टी पर आरोप लांदे होई आखेआ ऐ जे पार्टी नै राश्ट्री ग्रामीण रोजगार गरंटी कनून च महात्मा गांधी हुंदा नांs छड़ा चुनावी लाह हासल करने लेई शामिल कीता हा। कल भोपाल च पत्रकारें कन्नै गल्लबात करदे होई श्री चौहान होरें आखेआ जे कांग्रेस सरकार दरान मनरेगा, भ्रष्टाचार दा दुआ रूप बनी गेदा हा। उ'नें आखेआ जे कांग्रेस पार्टी नै बार-बार मनरेगा दा बजट घट्ट कीता हा। केंद्री कृषि मंत्री होरें आखेआ जे विकसित भारत जी राम जी योजना दे तैहत ग्राम पंचैतां मिलियै अपनी विकास योजनां तैयार करडन।

<><><><><><>

Aravalis SC

सुप्रीम कोर्ट नै अरावली प्हाड़ें दी परिभाशा च हाल च कीती गेदी तब्दीलिएं करी पैदा होई दिएं चिंताएं दा आपुं संज्ञान लैता ऐ। भारत दे प्रधान न्यायाधीश सूर्यकांत, जस्टिस जे.के मावेश्वरी ते जस्टिस ए.जी मसीह हुंदी छुट्टिएं आहली पीठ कल इस मामले पर विचार करोग। सुप्रीम कोर्ट दी एह दखलंदाजी अरावली प्हाड़ें गी परतियै परिभाशित करने दे मुद्दे पर लोकें दे बरोध दे मगरा सामने आई ऐ। पर्यावरण संगठनें ते नागरिक समाज समूहें चेतावनी दिती ऐ जे परिभाशा गी ढिल्ला करने कन्नै खनन ते निर्माण गतिविधियें दा खतरा बधी सकदा ऐ।

<><><><><><>

Sonowal

केंद्र सरकार नै 44 जहार 700 करोड़ रपे दिएं द'ऊं प्रमुख जहाज निर्माण परियोजनाएं लेई परिचालन दिशा-निर्देश जारी कीते न। एहदा मकसद भारत दी घरेलू जहाज निर्माण समर्थ गी बधाना ते वैश्विक मुकाबलेबाजी च देशै गी बेहतर बनाना ऐ। इ'नें परियोजनाएं च जहाज निर्माण आली माली सहायता योजना ते जहाज निर्माण आली विकास योजना शामिल ऐ। बंदरगाहें, जहाजरानी ते जलमार्गें सरबन्धी मंत्री सर्बानंद सोनोवाल होरें आखेआ ऐ जे एह दिशा-निर्देश इक स्थिर ते पारदर्शी ढांचा तैयार करडन जेहदे नै घरेलू जहाज निर्माण समर्थ बेहतर होग ते संपर्क गी बढ़ावा मिलोग। उनें आखेआ जे एह दौनें योजनां 31 मार्च 2026 तगर वैध रौहडन।

<><><><><><>

## Jaitley Tributes

रक्षा मंत्री राजनाथ सिंह, सेहत ते परिवार कल्याण मंत्री जे. पी नड्डा, पर्यावरण मंत्री भूपेंद्र यादव ते साइंस ते टेकनालजी मंत्री डॉ. जितेंद्र सिंह होरें अज्ज बड़लै नमीं दिल्ली च साबका केंद्री मंत्री सुर्गवासी अरूण जेटली होरेंगी उन्दी जयंती पर श्रद्धांजलि भेंट कीती। इस मौके पर भारती जनता पार्टी दे कई वरिष्ठ नेता मौजूद हे जिंदे च दिल्ली विधानसभा अध्यक्ष विजेंद्र गुप्ता, दिल्ली प्रदेश भाजपा अध्यक्ष वीरेंद्र सचदेवा, सांसद बांसुरी स्वराज ते दिल्ली सरकार दे मंत्री आशीष सूद शामिल हे।

<><><><><><>

## Dense Fog

अज्ज बड़लै उत्तरी भारत दे मते हारे हिसें च घने कोहरे करी हवाई ते रेल सेवाएं च विघ्न पेआ-केइएं राज्यें च कोहरे दी घनी चादरै करी किश नजरीं नेई आवा करदा हा जेहदे नै सामान्य आमद ओ रफ्त प्रभावित होआ। भारती मौसम विभाग नै प्रांतै च घनी धुंध पौने ते सीत लैहर जनेह् हालात दी अगगै गै पेशनगोई कीती दी ही। रेल सेवाएं पर बड़ा माढा असर पेआ-कई रेल गड़्डियां मिथे गेदे समें थमां केई-केई घैंटे चिरें पुज्जियां ते केइएं दे रस्ते बदलने पे। दिल्ली समेत केइएं शहरें च हवाई डोआरियें दे समें च तब्दीली करना पेई। रेल अधिकारिएं मुजब 4 दर्जन रेल गड़्डिएं शा बी मतियां अपने तयशुदा समें कशा चिरें पुज्जियां। सुरक्षा हीलें दे तौर पर रेल गड़्डिएं दी रफ्तार घटाई दिती गेदी ऐ जेहदे नै मुसाफिरें गी बड़ी औख-परेशानी पेश आवा करदी ऐ। खराब मौसम दा असर हवाई सेवाएं पर बी उन्ना गै दिक्खेआ गेआ। स्पाइस जेट, एयर इंडिया ते इंडिगो समेत केइएं एयरलाइन्स नै हवाई यात्रा करने आहलें ताई यात्रा सरबन्धी एडवाइजरियां जारी करिये उनेंगी संभावित चिर लग्गने गितै सौहगा बी कीता ऐ। हवाई सेवां देने आहिलिएं एयरलाइन्स ते रेलवे प्रशासन ने सफर करने आहले मुसाफिरें गी अपील कीती ऐ जे ओह स्टेशन जां हवाई अड्डें लेई रवाना होने शा पैहलें अपनिएं डोआरिएं ते रेल गड़्डिएं दी स्थिति दी जांच करी लैन। मौसम विभाग नै जम्मू-कश्मीर च कल्लै तगर अद्दे-दुब्बे तौरा पर बदल छाए दे रौहने दी पेशगोई कीती ऐ। 30 दिसम्बर गी किश थहारें पर हौली बरखा ते बर्फबारी होने दी मेद ऐ- 31 दिसम्बर ते पैहली जनवरी गी बी केई सारी थाहरें पर हौली बरखा ते खास करी उत्तरी ते मध्य कश्मीर दी उच्चिएं धारें पर बर्फबारी होने दे आसार न। जम्मू खिते दे मैदानी इलाके च घनी थमां दरम्याने दर्जे दी धुंध पौने दी बी खबर ऐ।

<><><><><><>

## Zelensky Trump Meet

यूक्रेन दे राष्ट्रपति वोलोदीमीर जेलेन्सकी हुंदा अज्ज फ्लोरिडा च अमरीकी राष्ट्रपति डोनाल्ड ट्रम्प हुंदे कन्नै बैठक लाने दा प्रोग्राम ऐ। एह गल्लकत्थ रुस ते यूक्रेन बश्कार बधे दे तनाजें गी ध्यानै च रखदे होई ते अमरीका आसेआ प्रोतै च शांति बहाल करने लेई कीती जा'रदी मध्यस्थता तैहत होआ'रदी ऐ। दमै लीडर 20एं नुक्तें आहली इक शांति योजना ते संभावित अमरीकी सुरक्षा गारंटिं पर चर्चा करडनं जेलेन्सकी ते उंदा प्रशासन वाशिंगटन कन्नै यूक्रेन दी खुशहाली लेई इक लम्मी अवधि आहले रोडमैप पर कम्म करा'रदे न।

<><><><><><>

## Mayanmar Election

म्यांमार च 5 ब'रे मगरा आम चुनांs होआ'रदे न। मतदान त्रे चरणें च होना ऐ। दुए चरण दा मतदान 11 जनवरी गी ते त्रीए गेड़ दा मतदान 25 जनवरी गी होग। म्यांमार दी सेना नै फरवरी 2021 च आंग सान सू ची हुं'दी नेशनल लीग फार डेमोक्रेसी दी चुनी दी सरकार दा तख्तापलट करियै सत्ता पर कब्जा हासल कीता हा। सू ची होर अजें बी सैन्य शासन दी कैद च न ते उंदी पार्टी गी भंग करी दिता गेदा ऐ। सैन्य शासन दा गलाना ऐ जे संसदीय चुनांs कन्नै लोकतंत्र दा रस्ता साफ होग। तोआई, विपक्षी दलें ते मनुक्खी अधिकारें सरबन्धी संगठनं इसी सैन्य शासन दी वैद्यता बनाई रखने दा जल्न करार दिता ऐ।

<><><><><><>

## BCCI-Squad

भारती क्रिकेट कंट्रोल बोर्ड नै मर्दे दे अगले आई.सी.सी अंडर-19 वर्ल्ड कप आस्तै 15 सदस्यी टीम दा ऐलान करी दिता ऐ। एह प्रतियोगिता अगले ब' रे 15 जनवरी शा 6 फरवरी तगर जिम्बावे ते नामीबिया च होग। भारती टीम दी अगुवाई आयुष म्हात्रे करडन, जिसलै के विहान मल्होत्रा टीम दे उप कप्तान होडन। एहदे अलावा वैभव सूर्यवंशी, आरोन जिर्योज ते अभिग्यान बी टीम दा हिस्सा होडन। 5 बारी दी चैंपियन भारती टीम गी ग्रुप बी च न्यूजीलैंड, अमरीका ते बांगलादेश कन्नै रक्खेआ गेआ ऐ। भारत 15 जनवरी गी क्वीन्स स्पोर्ट्स क्लब बुलावेयो च अमरीका खिलाफ अपनी मुहिम गी शुरू करोग।

<><><><><><>